

Tetun

Timor-Leste hatete katak identifika ona ema sira ne'ebé tau eskuta iha gabinete sira governu nian

10 de Dezembro de 2013, 21:05

Ministru Petróleu Timor-Leste nian, Alfredo Pires, hatete ohin ba ajénsia Lusa katak investigasaun sira kona-bá akuzasaun espionajen hasoru Austrália identifika ona ema na'in haat ne'ebé tau postu eskuta sira iha gabinete sira governu timoroan nian.



"Hamutuk ema na'in haat ne'ebé ami identifika ona durante ami ninia investigasaun sira", Alfredo Pires hatete ba ajénsia Lusa liuhosi telefone.

Ministru Petróleu nian agora daudaun iha Austrália hodi halo vizita traballu nian relasionadu ho akuzasaun espionajen nian no sei fila ba Timor-Leste iha loron-sesta.

"Ema sira maka utiliza programa ida tulun nian hodi hetan asesu ba gabinete sira governu nian", ministru esplika ona no hatutan katak autoridade timoroan sira la hatene katak ema sira ne'e, mane na'in tolu no feto na'in ida, serbisu ka la'e nu'udar koperante sira ba ajénsia koperasaun australianu nian, AUSAID.

Alfredo Pires fó sai notísia ne'e iha momentu ne'ebé imprensa australianu, polítiku no analista sira debate hela utilizausaun programa sira tulun umanitariu nian hosi sekreta australianu.

"Loos duni katak ne'e ladún di'ak ba ajénsia sira tulun nian no ba relasaun sira konfiansa importante sira ba programa ida tulun nian", Stephen Howes, diretór hosi Sentru Polítiku Dezenvolvimentu nian hosi Universidade Nasionál Austrália nian, hatete no sita iha jornál Sydney Herald Morning.

Antigu membru ida intelijénsia militar australianu ida, Clinton Fernandes, agora serbisu iha Universidade New South Wales, afirma mós katak importante halo inkéritu ida.

"Utilizausaun programa ida tulun nian hodi fasilita espionajen, karik hanesan lia loos, ne'e todan tebes no ema ne'ebé responsável tenki apresenta demisaun", nia hatete.

Tuir imprensa australianu, sekreta australianu afirma ona katak operasaun ne'e hetan autorizasaun hosi antigu ministru Negósiu Estranjeiru Alexander Downer, ne'ebé rekuza mós halo komentáriu ba asuntu sira relasionadu ho serbisu sekretu sira.

Iha loron-terça semana liubá, sekreta australianu tama iha eskritóriu advogadu ida ne'ebé representa Timor-Leste, prende fixeiru eletróniku no dokumentu sira, no prende mós pasaporte ida antigu espiaun nian ne'ebé hanesan sasin importante iha prosesu.

Timor-Leste akuza formalmente iha tribunál arbitral Haia nian katak Austrália halo espionajen bainhira hala'o hela negosiasaun Tratadu kona-bá Ajuste Loos Marítimu nian iha Tasi Timór iha tinan 2004.

Ho arbitrajén internasionál, Timor-Leste hakatak anula tratadu, hodi nune'e bele negosia limitasaun fronteira marítimu sira no hetan proveitu hosi esplorasau Grreater Sunrise nian ne'ebé iha folin dólar billaun.

Sapo TL ho Lusa



Produsaun husi PTC © 2013. Ho direitu hotu-hotu rezervadu.

SAPO nu'udar marka ida no mós [motór buka](#) nian ne'ebé halo iha Universidade Aveiro